



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym

TAPAK 8

**US tir atema toktepa nungi  
Biden anentsü ajungshir**

**T20I all-rounder tem rongnung Pandya  
No. 1 asayar kümogo**



VOL. XXI ISSUE NO. 262 (ADOK 262) DIMAPUR YANGTEPNÜ (THURSDAY) CHITENI (JULY) 04, 2024 ₹ 5.00

## CM Neiphiu Rio-i ULB councilors dang meranga inyaktsü ayongzüker

**Kohima, July 3, 2024 (TYO):** ULB election nung takok anguba councilor temi sorkar den külemi yaritepa inyaktsü ayongzüker ta Chief Minister Neiphiu Rio-i ashi.

Naga nunger kümzüka ayutsü aser state tali terenlokba aser tejakleni anir aotsü atema sorkar den yaritepsü mepishir ta pai ashi.

Kohima Municipal Council aser Chiephobozou Town Council nung NDPP councilors nem tenüngsang agütsüba sentong nung CM Rio-i iba ya metetdaksü.

NDPP ya regional party ka lir aser Naga putiotsü kümzüka ayutsü aser Naga sobaliba o inyaksangshitem wazüka ayutsü ta pai ashi.

ULB election nung NDPP candidates aika takok ngudaktsüba atema Rio-isa nübertem dang pelaba metetdaksü.

"State sorkari aiben ULB election agitsü merang saka lisopor teloktemi tetsür nem 33% lezmüksütsü memulungba den ali o kiojen nung tax agiba anema noktakba ajanga magiteti aru. Saka tang aliba state sorkari taoba Municipal Act agien aser tax agitsüba shilem endokba den nübertem den tetsür nem shilem lezmüksütsü nung haihaura kaa jembitet" ta Rio-i ashi.

"Küm 20 sülen election



agiogo aser takok anguba councilors-i jilatem ajungkettsü atema inyaktsü imlar. Nübertemi NDPP nem tashi agütsüogo aser onoki nüma tanga nübertem asoshi inyaktsü" ta paisa ashi.

"Asenok ajak longiemer Naga nunger kümzüka ayutsü aser state tejakleni aotsü atema inyakdi" ta CM Rio-isa ayongzüker.

"Sorkari ULBs loksaa maotsü atema Anti Defection Law ka benoktsü atema mapa inyakdar" ta paisa ashi.

"ULBs ajanga sarutetba tax ji pei pei ULBs nung terenlok mapa nung amshitsü. Iba sen ya sorkar den melemsatepsü saka Centre aser State sorkar den Planning Commission ajanga ULBs nem senotsü teyari agütsütsü" ta CM Rio-isa metetdaksü.

**BJP-i tashiyim inyakba  
ajanga NDPP-i tamakok angu**

"Lok Sabha election 2024

nung NDPP-i tamakok anguba ya BJP den tesentaktep ayuba ajanga liasü, kechiyong tamangba yimsü nung nübo agi tangar memener aser talisa Khristantem dak BJP-i tashiyim mapa inyaker ta tai tonglokja lir" ta CM Rio-isa ashi.

"NDPP lennirtem aser züngsemtemi kanga merangaka Dr. Chumben Murry-i Congress tsüngdang tamakok angu. Congress MLA ka danga mali aser units ajak shitak tenteta mali aser ano polling stations teimba ka nung parnok agents maliasü saka parnok takok angu" ta pai ashi.

"Lok Sabha election magidang Assam Healing (Prevention of Evil) Practices Bill, 2024 agizük aser iba ya Khristan anemba Act ka ta züngshir. Külen Manipur aser tanga state tem nung Khristantem dak tashiyim mapa inyakba ajanga onoki tamakok angu" ta CM Rio-isa ashi.

"Khristantem teimba ser aliba state nungi regional party ka ama NDPP-i Nagaland sobaliba, inyaksansghi aser tamangba yimsü kodanga senzüka meyutsütsü" ta paisa nenshia metetdaksü.

"Senotsü peria manguba state ka nung regional party kati Centre dang nungi teyari meshitsüsa akümer. BJP aser Congress telok ajak Hindu nunger lir. Asenoki national party tem sülen anidakba ya shisamaka lir anungji Naga nungeri regional party tashi itdaksütsü ayongzüker" ta Rio-isa ashi.

"NDPP-i Naga yimten tekara nung latetnür. Centre-i Naga nunger putiotsü ya khenyongi balaka ta agizükogo aser iba ya taoba Prime Minister Atal Behari Vajpayee-i sangdoktsüba lir" ta pai metetdaksü.

Rio-i küm 50 shi politics nung

ajangshia aruba indang lemsatepdang "Nagaland nung regional party kati danga kümsük tembanga meinyaktet" ta ashi.

Pai mezüng kümsük atema Chief Minister inyakdang Centre nung Congress sorkari tatemlen president's rule benok saka yamaji ajuruaka NDPP-i sorkar akümsüsa züngsem teimba aküm ta Rio-isa ashi.

Centre nung Congress-i UPA 1 aser 2 sorkar mapang Prime Minister Manmohan Singh-i Nagaland khen danga mesemdanga mesüra state nem kecha magütsü ta paisa ashi.

**NDPP-BJP tesentaktep  
junga lir**

NDPP aser BJP tesentaktep akhi ama akangakanga lir ta Neiphiu Rio-i ashi.

Lok Sabha election nung PDA consensus candidate Dr Chumben Murry-i tamakok anguba sülen NDPP-BJP tesentaktep mejungi aküm asü ta osangbeneri asüngdangdang "Onok tesentaktep akhi ama aser akangakanga lir ta külem sangdong ka agütsüogo" ta Rio-i langzü.

Tetsür councilors kar nem chairperson mesüra vice-chairperson agütsütsü asü koda ta osangbeneri asüngdangdang "iba atema ano mejembi saka ataloktsü imlar" ta Chief Minister Rio-isa langzü.

## CANSSEA ketdangpurtemi J. Alam den ajurutep

**Dimapur, July 3, 2024 (TYO):** Confederation of All Nagaland State Services Employees Association (CANSSEA) ketdangpur tasentemi Nagaland Chief Secretary J. Alam den ajurutepogo.

President Zubemo Lotha Tsanglao, Vice President Khriesezolie Kire aser General Secretary Yhunsenlo Kent nungeri anir CANSSEA teloki CS Alam den ajurutepdang parnok telok dak sendakba onük aika lemsatep.

Sorkari CANSSEA

tebilemstütem atema mapa inyaktsü mepishir ta parnok Chief Secretary dang ashi.

J. Alam-ia CANSSEA ketdangpur tasentem nem tenüngsang agütsü aser tesüba ketdangpurtemi sorkari amalitepa inyakba atema pelaba shisem.

CANSSEA-i parnok den yaritepa associations den onük balala angatettepba inyakba atema tenüngsang agütsü aser pai state sorkar mapa inyaker tem tebilemstü koktettsü atema tajungtiba agüja inyaktsü nangzük.

## Tanü East Dimapur Town Council tentetstü

**Dimapur, July 3, 2024 (TYO):** July 4, 2024 nü East Dimapur Town Council nung councilor tem tezüngzüktep agitsü osang metetdaksüogo.

Brihostibarnep 11:00 ako nung Dimapur Deputy Commissioner Conference Hall nung iba sentong agitsü ta DC Dr. Tinjongshi Chang, NCS-i sangdong ka nung ashi.

Iba sentong nung town council election nung takok angur ajak adentsü mepishir ta pai ashi.

Tezüngzüktep agiba sülen East Dimapur Town Council atema Chairperson aser Deputy Chairperson indang election agitsü ta paisa ashi.

July 1, 2024 nü Municipal Affairs Department, Nagaland Civil Secretariat, Kohima ajanga sangdong agütsüba, Nagaland Municipal Act 2023 kübok arlatem aser State Election Commissioner (SEC)-i Official Gazette nung results sangoktsüba sülen iba sentong agitsü jazüker ta Dimapur DC-isa metetdaksü.

## CM Meritorious Students Fellowship agütsütsü

**Dimapur, July 3, 2024 (TYO):** Nagaland Board of School Education (NBSE)-i ketdangsüa agiba High School Leaving Certificate (HSLC) tatidang nung 50 top rank holders / individual performers nem Chief Minister's Meritorious Students Fellowship agütsür.

Iba ya Chief Minister Neiphiu Rio-i kaketshirtem yaritsü atema tenzükba mapa ka lir. Iba fellowship ajanga takok tajung anguba kaketshir shia nem mezüng küm atema Rs.50,000 grant agütsür.

Iba sülen kaketshirtemi promotion/annual/semester examinations nung 80% ser tema marks ngura instalment 5 tashi Rs.50,000 agütsütsü.

January 31, 2020 nung Chief Minister Rio-i HSLC Examination 2019 nung 55 achievers nem tenüngsang agüja liasü.

Iba sülen COVID tenokdangbatem aliba ajanga July 2021 nung tanabuba batch kaketshir 51 nem tenüngsang agütsü.

Maneni, September 5, 2022 nü HSLC 2021 aser 2022

nung kaketshir 102 nem Chief Minister's Meritorious Students Fellowship agüja liasü.

HSLC 2023 aser HSLC 2024 nung Achievers nem taküm tenüngsang agütsütsü. Lok Sabha elections aser ULB elections atema Model Code of Conduct benokba ajanga iba sentong magitet saka tekaratiba nung HSLC 2023 aser 2024 50 rank holders nem tenüngsang agütsüba sentong agitsü ta NBSE-i metetdaksüogo.

## Dimapur nung 'Saturday Weekly Market' tenzüktsü

**Dimapur, July 3, 2024 (TYO):** Dimapur District Citizens' Forum (DDCF)-i July 13, 2024 nungi 'Saturday Weekly Market' ayonga alitsü.

Iba market ya Naga Shopping Arcade (Super Market) Dimapur nung alirtemi Assam nung oa Sunday markets nung aonsotsü aser shi-ango alir anungji Dimapur nung Saturday Weekly Market alitsüla ta DDCF-i bilema iba sentong tenzüktsü.

Saturday Weekly Market nung akshi aser aonsotsütem den kechisarena ajak angutsü. Talisa

iba market nung local nisungtem dena shishilembar ajaki yokyayokjitsü maongka angutsü ta Media Cell, DDCF-i ashi.

DDCF-isa Dimapur nung alir ajak dang iba Deobarnü Assam-i moi Saturday Weekly Market nung arua shishilembatsü mepishia metetdaksüogo.

Iba dak sendakba nung DDCF-i tsünglanglen agüja alirtem züngsema Market Committee ka tentetogo.

1. Tamsupok Jamir, Vice President, DDCF (Convenor), 2. Vikato Achumi, Vice President,

DDCF (Co-convenor), 3. Zhekato Yeptho, Youth Convenor, DDCF (member), 4. Jasper Marak, Executive member, DDCF (member), 5. S Bendang, Executive member DDCF (member), 6. Kato Yeptho, Executive member DDCF (member), 7. Bikash Brahma, Secretary Administration, DDCF (member)

Iba luden nung DDCF President Yibemo Kikon aser General Secretary Richard Haolai na ex-officio ama adentsü.



## Kohima nung Immunization Coverage atema workshop agi



**Dimapur, Chiteni/July 03 (TYO):** UIP Review Development of Immunization Coverage Improvement Plan indang osang tajungba nung prokshitsü asoshi workshop ka July 3, 2024 nü De-Oriental Hotel Kohima nung agia liasü. Tila tanur ajak vaccine agi nokdangtetba tashidak nungi kumzüka ayutsü asoshi immunization coverage shilem 95 junga mozü agütsütsü

mangdang yur iba workshop ya ayongzüka liasü.

ITSU- Ministry of Health and Family Welfare ajanga state nung June 11-18, 2022 anogotem Universal Immunization Coverage asadanga sülen iba workshop ya ayongzüik.

Iba sentong nung shisalen sayur ya Dr. Harpreet Singh, Dr. Kamlesh Kumar, Dr. Sonu Gupta, Dr. Swadesh Prasad,

Paras Jain, Dr. SandeepRathod, Dr. Mona Chopra, Ashok Sharma, Dr. Rajashree Roy, Mahesh Mishra aser Satish Kumar nungertem liasü aser parnoki onük balala nungi jembia.

Iba sentong nung parnoki AEFI & VPD Surveillance, Logistics and Supply chain, data recording and reporting, communication, urban immunization onük tem jembia liasü.

## Allied health & healthcare professionals tenüng zülüoktsü metetdaksü

**Dimapur, Chiteni/July 03 (TYO):** National Commission for Allied and Healthcare Professions Act, 2021 agi mela aliba ama Nagaland State Allied Healthcare Council (NSAHC) ya Government of Nagaland ajanga tentet.

Allied and healthcare professionals temi education aser services agütsüba azüoktsü, institution balala asadangsü, Central Register aser State Register anepalua ayutsü, access, research aser development maparen tajungba kumdaksütsü atema system ka

yanglutsü, scientific advancement tasenba amshitsü aser item dak sendaka aliba maparen tajungtiba nung ketdangsüa inyaktüsü nükjidong nung iba Act ya renem.

Aser iba Act nung shia aliba ama state nung aliba allied and healthcare professionals ajunga enrolment form nung shidak inoker tenüng zülüoktsü atema NSAHC nem July 15, 2024 tashinung enrolment form ya agütsütsüla, ta sangdong ka ajanga ashi.

Iba ya registration masü saka enrolment process dang lir.

Registration yabo khen lir National Council ajanga tuyuba ama inyaktüsü.

Enrol asütsü atema nüngdakba professions ya "The National Commission for Allied and Healthcare Professions Act, 2021" nung shia lir aser <https://thc.nic.in/Central%20Governmental%20Acts/National%20Commission%20for%20Allied%20and%20Healthcare%20Professions%20Act,2021.pdf> nungia download sütettsü, ta sangdong ajanga ashi

## Naga Mothers Association ajanga tenüngsang agütsür

**Dimapur, Chiteni/July 03 (TYO):** Nagaland nung Municipal aser Town Councils nung inyaktüsü shimteta aliba tetsür councillors ajunga nem Naga Mothers Association (NMA) ajanga tenüngsang

agütsür, shirnoki Nagaland nung küm 20 dak tema lir June 26, 2024 nü otsü tasen ka yangluogo, ta NMA sangdong ka ajanga ashi.

Pei aliba jila terenlok asoshi ochishia tajungtiba

nung inyaktüsü onok teimla lir aser state nung Elected Women Councillors batch mezüngbuba ama pei kümzüik takok ngua tembangtsü moatsür, ta NMA sangdong ajangasa ashi.

## Insect Collectors nem refresher training agütsü



**Dimapur, Chiteni/July 03 (TYO):** USAID-NISHTHA/Jhpiego den lungiemer Insect Collector training ka National Vector Borne Disease Control Programme ajanga July 2 & 3, 2024 anogotem Hotel Acacia, Dimapur nung agütsü liasü.

Dr. Kavito Zhimomi DPO-CD1 ajanga pela agizükba o jembidang Nishtha nungi technical partner dang pelaba lemsatep, koba USAID funded project ka lir aser John Hopkins University nung affiliate süa aliba non-profit organisation, Jhpiego

ajanga mapa kuma inyaker.

Dr. Zhimomi-i iba training nung shilem agirtem dang pei posting aliba tesem nung nendaka inyaktüsü ajungshia liasü.

Dr. R. Chubala Aier, Director & SPO (NVBDCP) ajanga 'Role of Entomology in Vector - Borne Disease Control & Job responsibilities of Insect Collector' indang onük nung ajemdaker jembia liasü.

Dr. Antoly Swu, Deputy CMO, Dimapur ajanga Vector Borne disease pattern shisadangsü aser item tashidak

nungi jembua alitsü atema shilem agirtem ajungshia liasü.

Shisalen sayur ya Nishtha Jhpiego nungi Technical Experts tem liasü aser parnoki Biology of Mosquito Vectors, Vector Bionomics, Mosquito Anatomy and Identification, Preparation and storage of adult mosquito samples & larvae rearing amala yimya aser inyakyim indang jembia aser Gopanala area aser Medical Colony nung Mosquito Larva & Adult Surveillance jangjatettsü asoshi item tesemtem semdanga liasü.

## Tanü Niuland Town Council züngsemtem senden amentsü

**Dimapur, Chiteni/July 03 (TYO):** Municipal Affairs Department ajanga July 1, 2024 nü sangdongba ama, Niuland Town Council züngsem atema shimteta alirtem July 4, 2024 anüngdang 11:00 ako nungi tenzüka Deputy Commissioner, Niuland indang Conference Hall nung senden amentsü, ta sangdong ka ajanga metetdaksüogo.

Iba senden nung Nagaland Municipal Act, 2003 indang Section 60 A nung aliba ama

Niuland Town Council atema shima alirtem Oath of Affirmation agütsü.

Iba sülen Nagaland Municipal Act, 2003 indang Section 12 (3) aser 23 nung shia aliba ama Niuland Town Council indang Chairperson aser Deputy Chairperson shimtsü. Anungji Niuland Town Council indang elected members ajak iba senden nung adentsü ayongzüker, ta sangdong ajangasa ashi.

## DC Chümoukedima ajanga ali kiburtem senden ayonger

**Dimapur, Chiteni/July 03 (TYO):** Chathe Valley, Medziphema Sub-Division, Chümoukedima nung Nagaki City atema Acquisition of land dak sendakba ken o jembitsü atema July 8, 2024 anüngdang 11:00 ako nungi ali kiburtem den senden ka Town Hall Niathu

Resort, Chümoukedima nung amentsü, ta Deputy Commissioner, Chümoukedima, Abhinav Shivam, IAS ajanga sangdong ka nung metetdaksü.

Anungji iba tesem küboki aitba ali kiburtem ajunga senden nung arua adentsü ayongzüker, ta sangdong ajanga ashi.

## PWD-i kumdanga senzüsempongtsü metetdaksü

**Dimapur, Chiteni/July 03 (TYO):** Noklak district kübok tzünglu tesashi tanen makai aruba ajanga lenmang tem nokdanga alinen alua lir, anungji nüburtem kumzüka ayutsü mechi kumdanga senzüsempongtsü metetdaksür, ta Executive Engineer, PWD (R&B) Noklak

Division, Er. Daniel ajanga sangdong ka nung ashi.

Noklak district kübok senzüsempongertem lendong timtem majurutsü mechi talisa aonung kanga kumdanga aser saksalema senzüsempongtsü ajungshir, ta sangdong ajanga ashi.

## Dimapur nung Toyota Urban Cruiser Taisor gari sayaogo



**Dimapur, Chiteni/July 03 (TYO):** Indian nung SUV market amokbangtsü nükjidong nung Toyota Kirloskar Motors ajanga Dimapur nunga Urban Cruiser Taisor sayaogo.

Toyota ajanga tang tesüsa sayaba gari ya linük tesem ajungalen jangratema anir senzütettsü.

Iba Urban Cruiser Taisor tema tereprangtsü kanga junger. Iba gari nung front grille, sleek 16" alloy wheels, aser variant kar nung All Black Painted Alloy Wheels angütsü.

Gari telung nung engine ya tabu asem lir, ka 1.0L Turbo, ka 1.2L Petrol aser ka E-CNG alitsü aser totzü kanga ajema atsütsü.

Iba gari nungya Toyota iCONNECT system, Head-Up Display, aser 360 View Camera keta lir.

Urban Cruiser Taisor nungya airbags trok, Vehicle Stability Control, ABS den EBD lir, anungji lendong aika nungi jembutsü.

Iba gari ya sen 7,73,500 (ex-showroom) nungi tenzüka lir.

## NSCN/GPRN (Niki) ajanga asükhu lemsatep

**Dimapur, Aami/June 03 (TYO):** NSCN/GPRN (Niki) ajanga sangdong ka nung, Sumi Region kübok Surumi yimtsüng nungi Zhevukhu Yeptho'er jabaso Lieutenant (posthumous) Shetoi Yeptho ajungbena aser anojungi July 2 nü Myanmar occupied Naga Lands nung asüba atema mang ayimer, ta ashi.

Pa ya Eastern Command kübok inyaka liasü.

Pai bendanga agütsür tashi angaa Naga lima tenzüka liasü. Naga lima asoshi pai bendanga agütsür tenzüka temaitsü 2nd Lieutenant Shetoi Yeptho,

bearing Army No-21083 nem Lieutenant jenjang (posthumously) agütsüogo, ta sangdong ajanga ashi.

Naga linük asoshi pai anibelem mesasai inyakba teti bilemtettsü aser Naga nung puti otsü nung zülua alitsü.

Anojungi pa asüba atema mang ayimer aser Naga lima nem linük meimba jabaso tajung agütsüba asoshi kinunger dang NSCN/GPRN-i pelaba lemsateper. Mangyimer kibong den asükhu lemsateper, ta NSCN/GPRN (Niki) sangdong ajanga ashi.





July 03, 2024 nü New Delhi nung Rajya Sabha senden tembangba sülen Ato kilonser Narendra Modi, House lenir Jagat Prakash Nadda aser Union Minister Lalan Singh nungeri linük tatong tir, Jagdeep Dhankhar ajurudang tangokba noksa nung angur.

### PM Modi-i Rajya Sabha nung Manipur aser NEET indang jembibi

**New Delhi, Chiteni/July 03 (Agencies):** Bodhbarnü Rajya Sabha nunga Ato kilonser, Narendra Modi-i jembiba mapang nung opposition MP temi yimyim ayima timtem agütsü.

Mongolbarnü Lok Sabha nunga Modi-i jembidang opposition INDIA teloktep nungi MP temi yimyim maneni ayima liasü.

Rajya Sabha nung Ato kilonser Modi-i maneni jembiba mapang nung opposition MP tem longkak aita senden nungi ayazüka kimai alu.

Bodhbarnü Modi-i Congress-i aniba opposition teloktep aija onük tenzüka liasü.

Modi-i, nübürtemi maneni NDA teloktep dak tamang kateta sorkar shim, ta ashi.

Modi-i jembiba mapang nung opposition MP temi, "Yazü jembiba anenang," ta yimyim ayim. Opposition MP tem kimai ayazüka aluba sülen Modi-i opposition aija, "Ochi o angatsü atema yazü jembirtem dak tashi mali," ta ashi.

Linük tatong Tir aser Rajya Sabha Speaker, Jagdeep Dhankar-ia Modi-i jembiba mapang nung opposition-i timtem agütsüba atema opposition aija, nenoki tenangzükba agiba tu akhümtsübutüsü, ta ashi.

Rajya Sabha nung Ato kilonser Modi-i jembiba tongtibang onük kar yamai liasü-"Kodang India ya alima nung rongsenketzung tulutiba linük tasembuba kümdir, ibaji ajanga lenla ajak kongshitsü. Terenlok

jenti alitsü aser maongka aika angütsü. Kodang India ya alima nung rongsenketzung tulutiba linük tasembuba kümdir ibaji ajanga alima-a kongshitsü," ta ashi.

NDA sorkar term tasembuba dak sendakba nung pai, "India nüchiso anguba aser Parliament puti otsü nung nübürtemi sorkar ka nem kümsük tasembuba (term) agütsü," ta ashi.

Aluyimertem indang Scheme dak sendakba nung Modi-i, "Congress sorkar mapang nung aluyimertem dang sentsüh atoktsü atema sen crore 60,000 scheme ka liasü, ajisüaka beneficiary list nungji kanga sensaker aluyimertem tenüngo maliasü," ta ashi.

"Tetsürtem leniba nung terenlok mapa inyaksü atema India-i tongtibang telemtetbatem agiogo aser tanübo asenoki item süngjang angur. Onokisa tetsürtem health, merükmeju aser libaliro jenjang tajungba akümtsü atema inyakogo," ta Ato kilonseri metetdaksü.

"Iba election ya linük temzüng kümsüktsü atema agiba election ka asü nungbo iba atemaji nübürtem onok shimogo. 1977 küm election ajanga linük temzüng kümsük," ta pai ashi.

CBI aser ED-i opposition lenirtem apuba dak sendakba nung pai, "Ni kecha marendaki ibai ashir, ochimashirtem aser ochimashi anema inyaksü asoshi ni Central agencies nem tashi ajak agütsüogo. Parnoki

ochishia inyakra sorkari tiyongtsü ia meinyaksü," ta ashi.

"Ni asoshibo ochimashi anema rarabaji election nung takok angütsü mesüra tamakok angütsü atema masü. Iba ya kü mission lir aser kü tangatetba lir. Linük tazüngla kümdaktsüba mesenji ochimashi lir. Ochimashi nungi iba linük kümsüktsü aser nübürtem nem ochimashi sempadaktsütsü atema ni inyaker," ta pai ashi.

Manipur nung rara dak sendakba nung Modi-i, "Manipur nung nisung 500 dak tema puogo, FIR 11,000 dak tema benokogo aser tesem aika nung tensa süngjemdar," ta metetdaksü.

"Tesüiba küm 5 tsüngda onoki northeast region nung inyaktetba kasa mapaji inyaksü atema Congress-ibo küm 20 agütsü," ta Ato kilonserisa metetdaksü.

NEET question paper leak asüba ken o dak sendakba nung Ato kilonser Modi-i, "Iba onük nung Congress party-i politics masayatsüla. Parnoki yamaji inyakba ajanga lanurtem tarutsü tia den asayar," ta ashi.

Paisa, "Lanurtem tarutsü tia den asayartem dang sorkari tai matoktsü, ta ni lanurtem dang nangzükter," ta ashi.

Jammu & Kashmir dak sendakba nung pai, "Jammu & Kashmir nung kiralongra anema raraba tatembanglen kati arudar; kiralongra aser separatist samadar," ta metetdaksü.

### Hemant Soren maneni Jharkhand CM inyaksü

**New Delhi, Chiteni/July 03 (Agencies):** Tawa JMM lenir Hemant Soren jail nungi chiokba sülen pa maneni Jharkhand chief minister inyaksü; party-i aniba teloktep nungi MLA temi melungtepa telemtetba agiba sülen pa kümsük tasembubaba Chief Minister inyaksü, ta JMM osang ka ajanga metetdaksü.

Taküm February 2 nü Champai Soren-i chief minister tenangzükba agia liasü, ajisüaka Bodhbarnü pai chief minister menden Hemant Soren atema azüngtettsüogo.

Champai-i Bodhbar nikongdang Angh, CP Radhakrishnan ajurua CM menden nungi anenba shidi agütsüogo, ta osang ka ajanga metetdaksü.

Bodhbarnü Champai Soren'er kidang JMM-i aniba teloktep nung lenirtem aser MLA temi JMM legislature party lenir Hemant Soren shimogo.

Iba senden nungji Congress Jharkhand in-charge Ghulam Ahmad Mir aser state president Rajesh Thakur, Hemant Soren kinüngtsü Kalpana aser adianu

Basant nunger densema liasü. Taoba hopta party nung inyakertem den jembidang Hemant Soren-i, pa anema asalentong yanglurtem anema parnoki telangzüba agütsütsü, ta metetdakja liasü.

BJP aija pai, state nungji BJP meindoktsü, ta metetdakja liasü.

Ano külen BJP MP, Nishikant Dubey-i X ajanga, "Jharkhand nung Champai Soren mapang temogo. Kibong nung ajemdaker tentetba party nung iba kibong nung madenertem atemabo yimtenren tsütsü maongka mali. Chief minister (Champai)-i Bhagwan Birsa Munda ajanga ajungmesoa ochimashir Hemant Soren anema apusotsüla," ta ashi.

BJP Jharkhand Tir, Babul Marandi-ia, Shibu Soren'er kibong nung madenba tribal tembo Jharkhand Mukti Morcha party nung mapang tatsüka dang alitsü, ta metetdaksü.

Ali tsütsü ochimashi ken o nung taküm küm tetenzüklen Hemant Soren apuba sülen pa ita pongu jail nung liasü aser June 28 nü ang Jharkhand High Court-i pa nem bail agütsü.



July 03, 2024 nü New Delhi nung Minister of Parliamentary Affairs, Kiren Rijiju-i osangbenertem den jembidang tangokba noksa nung angur. Kasa noksa nung Minister of State, L Murugan-a angur.

### Hathras nung nisung 121 ajemsetba tatalokba SIT-i bushisüngdangtsü

**Lucknow, July 03 (Agencies):** Uttar Pradesh kübok Hathras nung nisung 121 ajemseta asüba tatalokba bushisüngdangtsü atema Bodhbarnü state sorkari Special Investigation Team (SIT) ka tentetogo.

Lucknow nung osangbenertem den jembidang Chief Minister Yogi Adityanath-i, "Onoki ADG Agra leniba nung SIT ka tentetogo. Parnoki mezüng report ka agütsüogo. Parnok dang iba tatalokba ya jungjunga bushisüngdangtsü atema tuyuogo. Lenla balala nungi bushisüngdangtsü nüngdak," ta metetdaksü.

State sorkarisa retired High Court judge ka leniba nung judicial ajanga iba tatalokba bushisüngdangtsü telemtetba agiogo, ta paisa metetdaksü.

Yogi-i, judicial inquiry committee jagi iba lendong ataloktsüsa akümba nung aibelener jangjatsü aser iba tatalokba asalentong kuli

jangjatsü, ta metetdaksü.

Mongolbarnü iba lendong atalokba sülen Chief Minister-ia iba tesem sendanga liasü.

Mongolbarnü yimsü dak sendakba sentongji tembangba sülen sayutsüngirji sabang nungi aludang tetsürtemi pa dak kongshitsü atema asemtepa ao, saka pa anükertemi tetsürtemji nokdanga liasü.

Bhole Baba dak kongshitsü atema tetsürtem ajungbena asemtepa aoba ajanga iba lendong ataloka tetsür-tanur teimba ser nisung aika ajemset, ta tenük kuli alirtemibo shiogo.

Bodhbarnep UP Police-ia 'satsang' sentong ayongzükertem anema FIR ka benokogo.

Iba sentong nungji nisung 80,000 tashi dang adentsü temelaba agüja liasü saka nisung lakh2.5 adenshi, ta FIR nungji shia lir.

FIR nungji sayutsüngir Jagat Guru Saakar Vishwahari 'Bhole Baba' tenüngo densema mali.



July 03, 2024 nü Jammu nung Congress office kima Rashtriya Bajrang Dal züngsemtemi longkak aita Congress lenir, Rahul Gandhi noksa rongdokdang tangokba noksa nung angur.





# TIR YIMYIM

## YIMOBILEM (EDITORIAL)

DIMAPUR YANGTEPNÜ, JULY (CHITENI) 04, 2024

### Tatar senden nung asatepba

India nung state ajungalen nungi nübortemi shimtetba tatar 543 tashi amenba tatar sendenji atamata senden ka masü, idakji India nung tebang temeli aser tokolok-temulungjang ajak dena lir. Atangji, tatar ajakbo tashitemeteter masütsüa akok saka shiba südir sang state ka nungi pie nübortemi shimteteter yokbaji odangbo masü, pa mesüra la dakji lenisüba shisatsü aser tangatetba tajung karbosa lir, anungji tatar senden nung kati ka akümtsübutepa benshitsübaji ajaki imlar. Ajisüaka, India tatar senden nung, joko, küm ishika tatar yimsüsürtem senden memesük, tetsür tanur sentepa asateper amai kati ka jembiba mangai asadenba aser asatepba angur. Aji oda, tan 18 buba Lok sabha kümetter mezüing senden nunga government nung alirtemi opposition nung alirtemi jembiba mangar aser opposition purtemia government nung alirtemi jembiba manger ta nisung tain, takotet yimsüsürtemi tagitsü jembir ser nung o aika mangashii süidaktsüogo. Ibaji dang masü saka senden nung tangar tejembidak nung mejembidaktsüi ajadanga ayuba jagi amajok nung mapang endoker. Nübortemi yimsüsür shimer tatar sendeni yokba yimten, parliamentary democracy nungbo nisung kati jembibaji tatem ta masü mesüra telok kati dang jembitsü aser aji dang agitsü ta masü saka yimten telok ajak nungi jembitsü aser teimbai mulungba nung telemtetba agitsü. Atangji, tatar 543 adenshiba sendenji tuluka, anungji jeminüyonga tatar ajakibo mejembitettsü, kechiyong mapang agi meperitsü, iba jagi telok tulu aser tila ta pei pei yari mapang lemzüktsür. Aji oda, pei mapang arudang, akok tashi tejembirtemi taoba India aser tang India indang tensa tia aser asüing India nungdakba indang jembiba külem züngsemtema angatetdaktsütsü meranger. Atangji, yimten telok balala, anungji tangatetba aser nükjidonga balala, aji od ajaki anganütsüsabo aikati mejembitsü, kechiyong telok kati meshitak inyakbaji telok kati aitsütsü. Ano, talisa koba telok südir sang, opposition telokibo government-i inyakbabo shitaka aser junger ta shiabo manidaktsü saka inyakba ajak nung tai pua anidaktsü, iba jagi government nung alirtemi kümdanger aser nübortem ajangzükter. Parliamentary Democracy topur ajungji aji asütsü. Aji oda, tanganütsü meketaka tatar senden nung tatar ajaki tangari jembibaji aremzüka angar telangzüksü tashi pei mapang nung langzua ken o lemtep asübo, ano, koda tajung aser tajangzük süla. Atangji, tang tatar senden nung opposition teloki tangar jembiba pobanga asatepba ya mezüing masü. Küm 10 jakdanga BJP telok opposition nung alidanga Congress teloki aniba UPA government nung alirtemi jembibaji majung tatar senden nung yimyim ayima asatepba asenoki nguogo. Aji oda, joko tatar senden nung tangar jembiba mangai asateptsüba ya Lok sabha aser Rajya sabha nung sobaliba amaika kümogo. India ya kati ka aremzüktepa aliba lima, iba jagi 'tolerance' indang yimten yimsüsürtemi kanga süoki ia jembir, kechiyong India ama kin kidong, oshi-oben aser sobaliba balala zünger mezüingma alidak kati ka dang aremzüksübutepa kin ka taküm alitsü asoshi azü aser mopong amai lir. Aji oda, aseni anganüba o tajung jembidang angatsü saka aseni manganütsüsa jembibangi dangbo tanga mangai asatentsü ta asüba shisatsüji tain masü, Kasaji aseni jembibabo tangar nem angadaktsütsü saka tangari jembibabo mangai oadoktsü ta asüba asüküm aser maremzüktetba jakla aketertemjia yimten yimsüsür memesük aser tangatetba tajung aliba purtem masü. Tatar senden nung tatartemi ken o benoka jembiba nung pei lima aien main aser pei nübortem dak tangatetba ali mali metettsü, kechiyong tatar senden nung jembiba jagiang tajung süli, tamajung süli pei ki tonga arutsü. Itemji angateta tatartemi tang nungi danga tatar senden nung o tejembidak nung shingaia shinga mesongtemi aremzüka atatsü telemtetba takang ka agitet nungbo, iba jagi ano alima kintem aika ajateta India inla.

## OLEMSABANG

### LOKSABHA ASER ULB ELECTION AJANGA NAGA NUNGER TIA TALI JANGJA ALIBA ANO TALI JANGJADAKTSÜR

~ Tinuniken, Mangkolemba

Naga nebur tangateter, tulus, takar aser tashir timba ka municipalities aser town Councils litsü nung alirtem lir. Yimtsüing nungi tenzükter, town, jila balala nung alirbo jenbua lir ta mangatetdaktsünur.

Aekate jembir tamangba yimsu ajanga Congress MPI Loksabha election nung takok angu, saka aji masü ta shitetsüsa ULB election result ajanga kuli sayur.

Nebur rongnung pei jurila ajangzüktsü atema bilemer tosa atokadok. Sen, rongsen aser yamala temesuzükba jenti nangdaka yutsüding khristan ka ama mesui tatidang mekoteter nebur jenti kümadok.

Pei dang tangar taoba, kenyongi amadoker ni, ozü, onok ta jembir aika aküm. Manger mesangwa tsüingda, mapang tatsü ka tsüingda tangatetba kenyongi melenshia alima nungi yimlar aieka neburtem dang masü lenir tashi langkoshishi agi laoadok. MP election tangatetba kenyongi dang tasüingla kümdaktsü.

Nagaland khrista asoshi, Sarasadem tamangi akoker ta jembirtem, sentepi aortem, ni khristan tajung ka ta ashirtem item kesa nisungtem toagi tekümet agütsüsang Tsüingrem dak amangertem, temesuzükba tasa tapu balala nem kokdaktsür yipru tulu arua anakshidang Yona dang masü Pilate den Yihuda Iskariot khristan nebur rongnung jenti jateta adoka dok. Rongnung kodang item jakla asemprongla tena lidir yipru sungjema akümtsüji kenyongi tasak.

Taküm Tsüingrem dak amangertem inyakyim ngua, tasü tsüingrem külemertem pangka pang lemteper. Tatok nangzükadoktsüji kecha masü tangatetba yur, taküm Tsüingrem dak amangertem sen aser temesuzükba balala nung tsükdaktsü aser tasü tsüingrem dak amangertembo khristan neburi amokmerenba agi tetsübu ajanga tsüker külen tatidang nung takok mangu ama aeika tamakok anguba kuli tejangja ULB ELECTION ajanga sayur masü na.

Tamakok, takok angubajibo yutsür na ajanga election ozüing anema inyakba agi kiyonger den meputep dena na aliba lima memeruk kümdakja menungdaktsür masü no.

Ochi meimba nebur maliba agi ochi lenir madoker. Ochi lenirji ochimashir neburi rasaktsür. Metetsenmonga ozüing anema inyakba nebur aser lenir asen Naga nung rongnung ali tashi tsüingken tetsü aser techanu otsü to dang asütsü.

Naga nebur aser lenir rongnung yimtsüing nungi tenzükter Kohima capital atena oa alir, tematiba jenjang nungi tekepoktiba jenjang tashi nung alir shirnoki tanu ni, ozü aser onok dang jungerbo ta angateta lir, iba tangatetba kenyongi balaka nung angateta melenshiba mapang ka ULB ELECTION 2024 ajanga tansütsü agiba den asangsang nung mapa agi sayutetba Naga senso ka ka küma, "Alima nem ni, ozü, onoki kechi agütsüteter aser alima atema kechi ni, Ozüi, onoki inyakteter ola yim yim tulutiba nung ayimdi. Ojang dang angateta yur azü yir amai melili arung!

Nai menendaktsüba tesem aser nisung, naisa meruktetsü aodang naji nai komaka agia alitsü amai "Tsüingken tetsüi techanu dang indang indanga jajang ta ashidang oja nai tama indanga jajaa sayuang"

Iba tia kesaji tanu asen lima tashidak meteta dang yur mozü agütsürtemia mozü taila agütsüba aser mozübo shidak agütsür saka shirangertemi agizüka mechitetba agi taneptsüa mangur tasüa masür. Taneptsü angutsüla mesura suadoktsüla. Anapronglaji matalokerji jokorla kongseta asütsü melenbo, sudaktsür tanaben shia aruba rongnung atener ka akümtsü mesura shirang jungjunga aneper rongnung atentsü yim yim ola menunngangi adoktsü menur asü yonga atokdima.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



# Missionary ka den par kibong züngsem 5 mi lendong nung asü



© KSTP  
Wisconsin Evangelical Lutheran Synod nungi missionary, Pastor Steve Witte aser pa kinüngtsü na noksa nung angur.

**July 03, 2024:** US nung Wisconsin state kübok Juneau County nung aliba Wisconsin Evangelical Lutheran Synod nungi missionary, Pastor Steve Witte den par kibong züngsemtem sodi amongi oa aliba mapang mi lendong ka nung süogo, ta Arogoi metetdaksü.

June 01, 2024 nü Wisconsin Evangelical Lutheran Synod (WELS) Tir, Mark Schroeder-i, "Yashi iba lendong atalokba osang onoki angazükogo. State kübok Wisconsin Dells nung sodi amongba mapang pa den par kibong züngsem pongu mi lendong nung asü," ta metetdaksü.

Paisa, "Kibong ka nungi züngsem trok tashi asüba tejayshiji o agi rasaa shitettsü makok. Iba ama mapang ka nung Tsüngremi dang asenok mulung süneptsütettsü. WELS kibong nungi züngsem trokbo tang asen Kümtetdakba den külemi tepela aser tesünep nung lir, ta amanga mulung anisüngzüker," ta metetdaksü.

Steve Witte ya Thailand nung missionary inyaka liasü. Pa den jala ana- Lydia Witte aser Charis Kuehl na aser semchir tetsür asem- Stella Kuehl, Lena Henselin aser Merci Henselin nung kasa lendong nung

süogo, ta Arogoisa metetdaksü. Juneau County Sheriff Office-i sangdong ka ajanga, Amongnü 2:35 ako meta Necedah nung aliba W 5040 Morros Mile Road nung ki ka rongdar, ta onok nem osang metetdakja liasü, ta metetdaksü.

Kidang nungjagi nisungtem anizükba mapang nung nisung pongubo samaogo ta parnok nem metetdakja liasü. Kidang nungjagi tain asem aser tanur asembo manizükteki liasü.

Firefighters-i ghonda asem tashi miji enseptsü meranga liasü aser parnok iba tesem nungji ghonda 12 liasü.

Pastor Witte ya 2000s mapang nung Green Bay nung aliba Beautiful Savior Lutheran Church nung pastor inyaka liasü. Pabo mi lendong nungjagi jenbua liasü saka par semchirtem ki telung nungji lir ta metetba sülen parnok kümzüksü atema pa tanaben ki telung jagi atu, ta WELS World Missions Administrator, Pastor Larry Schlomer-i metetdaksü.

"Kibong ka nungi dang aika asüba ya takoksa tulu. Pabo mi lendong nungjagi jenbuteta liasü saka par semchirtem ki telung nungjisa lir ta pai metetba sülen parnok kümzüksü atema pa tanaben ki telung jagi atu," ta

Schlomer-i metetdaksü. Schlomer-isa, "Pastor Witte ya WELS Asia Missions Team nung tongti liasü. Pa bendanglen küm aika aliba agi pa meyipa arüba sülen pai par kibong ayongdena külemi amongtsü atema sentong yanglua liasü saka tia maka iba lendong nung asü," ta metetdaksü.

"Pa atema pa kinüngtsü Mary aser par chirnurtemji kanga tongtibang liasü. Ibayongji pa mission wadang nungi meyipa aruba sülen parnok külemi sodi jangratema amongtsü atema parnok adenshia liasü. Khrista osangtajung proktsü atema pa dak tejangraba tulu liasü, ibaji ajanga pai akokba tashi kanga meranga inyak," ta Schlomer-isa metetdaksü.

## July 5-7 nung NBCC Youth Prayer & Sunday amongtsü ayongzüker

**Kohima, July 03 (TYO):** Nagaland Baptist Church Council (NBCC) Youth Department-i NBCC kübok Arogo ajak, talisa Youth Departments dang July 5 nungi July 7 tashi NBCC Youth Prayer & Sunday amongtsü ayongzüker, ta Youth Department, Nagaland Baptist Church Council-i sangdong ka ajanga metetdaksü.

NBCC Youth Day ya 1984 küm July 4 nü tenzüka liasü, aser iba küm nungjagi tenzüka küm shia lanurtemi longjemer NBCC ministry atema sarasademer.

Iba dak sendakba nung NBCC Youth Department-i züngsem Arogo ajak dang July

5 nikongdang mesüra pei dak apet anogo ka nung Arogo compound merüka amongtsü, July 6 anepdang 6:00 ako nungi anüngdang 12:00 ako tashi lumia sarasademtsü aser nikongdang asayaba moapu nung saisapong asayaba den külemi Lai zünga tekülem agitsü metetdaksü.

Tatamsa July 7 nü Youth Sunday tekülem sentong agitsü metetdaksü.

NBCC Youth Secratery, Rev. N. Suhuto Chishi-i Youth Secretaries ajak dang peipei Arogo nung lanur lenirtem nem iba osang ya metetdakjang aser sarasadem onüktem bendena tekülem sentong ayongzüka agitsü metetdaksü.

## Russia nung putir ana chiokba atema Pope Francis-i pelaba lemsatep

**July 03, 2024:** Russia nung pua aliba Ukraine nung putir ana chiokba atema Pope Francis-i pelaba lemsatepba den külemi rara mapang pua alirtem atema ajaki sarasademtsüsüla, ta ayongzüker.

Pope Francis-i, "Greek Catholic putir ana chiokba atema ni Tsüngrem nem tenüngsang agütsür. Iba rara mapang pua alirtem ajak kidangi shilangtsü atema ni sarasademer," ta metetdaksü.

## ANOGO ABEN TSÜNGREM DEN

### Temenen nem tashiokdaksü

"Tsüngrem aser asen Kibuba Yisu temetetba nung nenok dangi taochi aser tesünep jenti süang,... Pa metetba ajanga pa Tsüngrem ain agi taküm aser temeshiba atema asenok nem kechisarena agütsüogo."

(2 Peter 1:2,3)

Khrista dak alibaji asenok ajungtsüba sapiji sürabang, kechiba tamanger aikati tanela nung ibaji tashi küma mamshitetter? Kechiaser asenok satan nem ashiokdakja aliba ajanga ibaji mapa agi meinyaktetter.

Temenen tashioktsübaji yimya aisü nungi arur. Tatidangbai asenok tazüokba tashi meiti kümdaktsür. Temenen asen meketa alibaji tetsübutsü ka kümdaktsür. Temeneni tanela tejangraba samadaktsür, auyatsü, nüktapangta, ochi mashi ajak inyaktsü jangradaktsür aser memeteti tamangertem aika iba ongken nung tsüker, idangji asenok sasa asenji tamakok angur ama ngudaktsur, iba jagi ano tanela nung tamakok dang tali aludaktsür. Asenoki temenen menaba sülen, asenoki asen sasa temenen nisung ama angur aser ano Temenen tali menadaktsür. Satan tasai asenok meyokdaktsür, aser teimla makai kümdaktsür, ibaji satan tashioktsüba.

Tekülakokdaksü. Kechiaser Khristai pa kangki ajanga kümzükbaji na lir. Ne libaliro agi na mekümzük saka nai amangba ajanga iba maongkaji angur. Tsüngrem O-i asenok dang ashir, "Temeimbatem, tang asenok Tsüngrem Chirtem lir" (1 Yohan 3:2,3).

"Temeim Kibur, tanü kü mulungjang Ne o ajanga tasen akümstsü ni Ne dang mepishir," ta asenoki pa dang shidi.

## 2023 küm Germany nung nisung 400,000 dak temai Arogo toktsü

**July 03, 2024:** 2023 küm Germany nung nisung 402,694-i Catholic Arogo toktsüogo, aser ibaji 2022 küm den medemdangra tera agi ishiba lir, ta German Bishops' Conference-i metetdaksü.

2022 küm nungbo nisung 522,821-i Arogo tokja liasü.

Germany nungbo Arogo saru inyakyim ajanga Arogo züngsemtemi khuret tulu ajurur.

Arogo toktsürtemi joko Arogo nem saru agütsütsü menüngdak.

Tenla kidang raraba hadir meiyipa aruogo, ta Ukraine Tir, Volodymyr Zelenskyy-i metetdaksü. Paisa X ajanga, ketdangsertemi Redemptorist "Item nisungtem kidangi putir ana- Ivan Levytsky aser Bohdan Geleta na pua liasü, ta Ukrainian Greek Catholic Church-i metetdaksü.

Arogoisa, putir ana nemji tenati aibelenogo ta nanzükdaktsütsü atema tena kanga reshikangshia liasü, ta metetdaksü.

Putir anaji densema tepuokdak alir nisung ter

meiyipa aruogo, ta Ukraine Tir, Volodymyr Zelenskyy-i metetdaksü. Paisa X ajanga, "Item nisungtem kidangi shilangtsüsa Vatican-i inyakba atema parnok danga pelar," ta metetdaksü.

Archbishop Sviatoslav Shevchuk-ia putir ana chiokba atema Pope Francis den Vatican nungi Cardinal ana- Pietro Parolin aser Matteo Zuppi aser Archbishop Visvaldas Kulbokas nung dang pelaba lemsatep.

meiyipa aruogo, ta Ukraine Tir, Volodymyr Zelenskyy-i metetdaksü. Paisa X ajanga, "Item nisungtem kidangi shilangtsüsa Vatican-i inyakba atema parnok danga pelar," ta metetdaksü.

Archbishop Sviatoslav Shevchuk-ia putir ana chiokba atema Pope Francis den Vatican nungi Cardinal ana- Pietro Parolin aser Matteo Zuppi aser Archbishop Visvaldas Kulbokas nung dang pelaba lemsatep.

Ano nisung karibo tamalen Arogo lenirtemi ozüng alema inyakba mapatem ajanga tejayshiji nung züngsemtemi Arogo toktsür.

Item tebilemstsü bentettsü atema putirtem aser Lay organization-i "Synodal Path" kübok küm asem tsüngda inyakyim melenshitsü atema

Nisung aikati Arogo toktsüyonga Germany nung aliba Catholic Arogo nung tang züngsem million 20.35 shi lir, ta German Bishops' Conference-isa metetdaksü.

Ano nisung karibo tamalen Arogo lenirtemi ozüng alema inyakba mapatem ajanga tejayshiji nung züngsemtemi Arogo toktsür.

Item tebilemstsü bentettsü atema putirtem aser Lay organization-i "Synodal Path" kübok küm asem tsüngda inyakyim melenshitsü atema

Germany nung Arogo züngsemtem ajema akümba ya Catholic Arogo nung dang masü. Protestant Arogo nunga tesüiba küm ka tsüngda nisung 380,000-i Arogo toktsüogo.

Ano United States Catholic Arogo nungbo tesem kar nung züngsem renloker aser tesem kar nungbo züngsem ajema akümer. Northeast nungbo züngsem tajemba akümer saka South Florida nungbo züngsem kanga renloker.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tait

(adj) tashi tulu (powerful, energetic)

\* Samson tashi tait asangur ka liasü.

Tait

(adj) sünga aliba, aika akaba ( filled one, plentiful)

\* Takar taiter kidang senpong-jangpong teti tait alir.

**OLONG PAITEP # 6836**

1				2			3	4
5		6						
						7		
8								
								9
		10				11		
				12			13	
14								
						15		
16								

**TIPIEN**

- 2. Auonungchiyongsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

**LANGTSÜNGLEN**

- 1. Lenmang
- 2. Aor kidong ka tenüng
- 3. Tenarong maten
- 4. A \_ \_ \_ g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S \_ \_ \_ k
- 14. T \_ \_ \_ r

**OLONG PAITEP # 6835 TELANGZÜBA**

**TIPIEN :**

- 1. Tesangra, 5. Mungo,
- 7. Kisen, 8. Salem,
- 12. Semki, 14. Kilem,
- 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa,
- 3. Aon, 4. Aso, 6. Nile,
- 9. Alizüng, 10. Omen,
- 11. Lemta, 13. Ola, 14. Kin.

**NAI-A YA METETTER MA**



India nunger cricketer Hardik Pandya-i T20 World Cup 2024 nung kanga junga asayaba ajanga ICC Men's T20I all-rounder ranking nung No.1 jenjang tongtetogo. Hardik Pandya-i jenjang ana atuba sülen Sri Lanka nunger Wanindu Hasaranga den top-ranked men's T20I all-rounder kümogo. T20 World Cup takok anguba captain-i bat aser ball nung shilem tajung agia liasü. June 29, 2024 nü Kensington Oval, Barbados nung India-i South Africa den final asayadang Hardik Pandya-i kanga junga asayateta liasü.

**Assam tzümetsüng nung Indian Army-i yariteper**



**Guwahati, July 3, 2024** (Agencies): Assam nung tzünglu kanga aruba ajanga tzümetsüng tensa tulu ajurua lir aser iba nung Indian Army Rescue and Relief columns ajanga yariteper. Tang tashi nung Indian Army-i Bor Fakial yimtsüng nung nisung 50 tashi kümüzükogo ta

defence spokesperson kati ashi. Tsüngsang mejungaka sepaitemi mapang telatet makai rescue and relief operations inyakdar ta pai ashi. Indian Army jawan temi chiyungtsü, tzü, mozü aser tanga nungdakbatem dena emergency supplies agütsüdar. Pei talidak toktsür temporary

camps aser shelters nung jenoka alirtem yaridar. Indian Army-i tensa kanga junga repringdar aser nungdak adokdang rescue and relief operations inyaktsü atema nübo aser osettem renema lir ta defence spokesperson-isa metetdaksü. Assam nung taküm tzümetsüng ajanga district 23 nung nisung 11.50 lakh dak kongshia lir. Brahmaputra aser tanga ayongtem nung tzü talila ayimer aser ayong teimba nung danger mark atena yimdar ta ketdangsurtemi ashi. Taküm Assam nung tzümetsüng, anentsüh aser yipru lendong balala nung nisung 48 süogo.

**Manipur nung nisung kari Meitei yimtsüngtem amak**

**Imphal, July 3, 2024** (Agencies): Imphal East district kübok nisung kari yimtsüng kar amakba ajanga Meitei nunger aika jena ao. Mongulbar aonung 8:30 ako meta tenemlen nungi nisung kari long-range weapons amshia Sabungpok Khunou, Thamnabokpi aser Sanasabi

yimtsüngtem amak. Iba ajanga state forces aser village volunteers kari parnok den khatep aser yasung 9:50 shi tashi parnok tsüngda injang yoktepa liasü. Meitei nunger yimtsüngtem ya Kangpokpi district anasa lir aser iba district nung Kuki nunger teimba ser lir. P Phaimol, Thamnabokpi

asur Uyokching-Hiyangpat nungi Meitei nunger yimtsüngtem amak. Iba mapang Thamnabokpi yimtsüng nungbo ki aika raksatsüogo. "Onoki security kanga nungdaker. Onoki MLA den ajuruteptsü tebilemba lir" ta Thamnabokpi nung Heikrujam Memcha Devi-i ashi.

**Guwahati nung law student ka pur ao, saka lai jenteta aru**

**Guwahati, July 3, 2024** (Agencies): Guwahati kübok Six Mile nung nisung kari law student ka lar PG nungi pur ao. Tebur kati la asüngdangba atema ma ta ashiba sülen kakatshir pur ao. Tetsürla ya law student ka lir aser Ashraf

Zaman aser pa den yariteper kari la pur ao. Ajisüiaka tetsürlai parnok dang nungi jena otet aser Amingaon nung Narayana Hospital nung jenok. Mozü ki ketdangsurtemi la timtemba ajiteta la kümüzük.

Iba tatalokba atema Dispur police-i Ashraf Zaman aser pa den yaritepa ka puogo. Police-isa maneni temlung melemi bilemer kar aputsü atema bushitepdar aser kakatshir pur aoba kuli tejangja metettsü merangdar.

**GOVERNMENT OF NAGALAND  
DEPARTMENT OF SCHOOL EDUCATION  
SECRETARIAT: KOHIMA  
NOTIFICATION**

**Dated Kohima, the 2nd July 2024**

**NO.NLD/SS/MIS-12/COR/2023-24:** Pursuant to the directives of Ministry of Education (MoE), Department of School Education & Literacy, Government of India, all States are required to implement the "Real Time Online Unified District Information System for Education Plus" (UDISE+) and Student Database Management System (SDMS) for Child Tracking System. Data and information on schools (includes all Recognised Private schools, schools under CBSE, ICSE, all schools under State Government) is required to be collected, furnished and uploaded online in the format developed by the Ministry of Education, (Go).

The end result of the data collection/collation will reflect the status of education in the State and will enable deriving of Gross Enrolment Ratio (GER), Net Enrolment Ratio (NER), Dropout Rates, Transition Rates and other important Education indicators for the State.

From this current Academic Year, the online updates in UDISE+ & SDMS 2024-25 will be maintained "Real Time" for which all schools will update their **Profile & Facility Module, Teachers Module and Student Module** and maintain the latest school status using their respective schools Login ID and Password.

**Student Module** is now open and active for entry/ upload of Student Progression for which the steps given below should be followed:

- i. All schools to login and first complete the progression of students who have left school (with Transfer Certificate/Without Transfer Certificate) so that other schools fetching their details from the drop-box may not face any issue.
- ii. Schools can only upload the fresh details of students of entry level (Pre-Primary to Grade 1)
- iii. For updating details of students (Grade 2 and above) not uploaded in the previous year (missed-out), School may obtain the prescribed DCF (soft copy) from respective EBRC and submit the same for upload.
- iv. For students transferred from another school, Schools will use the Import Module to fetch their detail from the Dropbox using their Permanent Education Number (PEN).
- v. For transferred students who do not know of their PEN, schools may submit the Name of the Student as per School record along with name of the previous School and district to respective EBRC for location of their PEN.
- vi. In order to maintain Real Time data in the online UDISE+ portal, all schools henceforth will immediately update any change in data/information of School, Teacher and Student.

Schools recognized under the Department of Education, Government of Nagaland and not registered in the UDISE+ portal are instructed to immediately register on the Online UDISE+ portal since the Permanent Education Number (PEN) of students generated from the portal for Child Tracking System will soon be made mandatory.

Under the RTE (Right to Education) Act, accountability has been set at all levels of data collection/ update to check data consistency and timely submission. All School authorities are therefore cautioned against submission of inaccurate/ false data/ information pertaining to their respective schools. The School Education Department will be constraint to invoke the non-cooperation clause/ derecognition/ presume non-existence of the school in the State for all those Private schools, schools under CBSE, ICSE, all schools under the State Government failing to comply the above stated directives.

Sd/-

**(KEVILENO ANGAMI)**  
Commissioner & Secretary,  
School Education and SCERT & Chairman NEMS.





OFFICE OF THE MERANGKONG SENSO MUNGDANG

P.O. TULI - 798618 DIST. MOKOKCHUNG : NAGALAND

TENÜNGSANG AGÜTSÜR

Mr. Lanutoshi Yaden S/o Meyikokba Geoffrey Yaden elected for Ward 9 Dimapur Municipal Council.



Ms. Temjenkala Yaden D/o Mr. Lipok Yaden & Asangla. Lai NPSC - CESE Examination nung takok ngua English nung Assistant Professor ngutetba asoshi Merangkong Senso Mungdangi tenüngsang tulu agütsür.



Mrs. Imlinaro S Ezung D/o Meyikokba Geoffrey Yaden elected for Ward 21 Dimapur Municipal Council.



Mrs. Chubarenla D/o Late Tsuktisüba elected for Ward 7 Tuli Town Council women Reservation. (Patizung Ward)



Mr. Alemchuba S/o Late. Temsukaba elected for Ward 9 Tuli Town Council, (Longli Lenden Ward)



Mr. Imlionen Lkr S/p Late Sakulepten elected for Ward 6 Tuli Town Council, (Tuliyong Ward)



Mr. K. Imlitemjen Jamir S/o Late. Kipangwaba elected for Ward 8 Tuli Town Council, (Longpong Ward)



Mr Temsumenba Imsong S/o P. Lanutoshi Imsong elected for Ward 5 Tuli Town Council (Mendenti Ward)



2024 küm ULB Election nung takok angur candidate ajak nem Merangkong Senso Mungdangi- tenüngsang tulu agütsür.

Nenok shisa tajung agi pei Ward nüburtem temoatsü nung anir aotsü yimla-a atar. Tajung Tsüngremi nenok ajak arishi aser yimsüsütsü shisa tajung moajangma.

Sd/- Imlituba Imsong President Merangkong Senso Mungdang

Sd/- Takomangyang Secretary Merangkong Senso Mungdang

METONGSHITSÜR

Tir Yimyim 29 & 30 June, 2024 Adok nung ni kechi züluogo, aji record kar repranga züluba masü, anungji iba adok nung kechi medokmeperisa ali, itemji ni meyipa agir. Anungji iba adok nung aliba O temji Documents ama mamshitsü mepishir aser kü tenüng nung shingaia zülubanglu adoktsü memelar.

Sd/- M. Meren Ex. Pastor

Ukraine-i Novorossiysk amakba nokdangogo: Russia

Moscow, Chiteni/July 3 (Agencies): Russia sorkari Bodhbarnü sangdong ka ajanga ashiba agi, parnoki Ukraine-i tzüyim nung amshiba drone amshia Novorossiysk nung Black Sea port amakba nokdangogo.

Moscow nung Ministry of Defence-i Bodhbarnü ashiba agi, Russia nung sepaitemi iba rongnendak amaktsü atema yokba naval drone ana raksatsüogo. Ita ishika tsünga Ukraine-i Black Sea nung Russia nung indang rong aser infrastructure tem raksaja arudar.

Drone ana yagi kecha teraksatsüba bener marutsü aser rong inyaksangshiba nunga kecha tetsükdaktsü madokdaktsü, ta yimti ketdangsurtemi ashiba Russian state news agencies sangdong ka ajanga metetdaktsü.

Novorossiysk Mayor Andrei Kravchenko-i Bodhbarnü tzükümi maotsü atema tenokdangba agütsü, aser ki ana terara raksaba indang osang metetdakja liasü.

Novorossiysk yimti ya May

ita-a drone amshia maka liasü. Iba yimti nung amenoka aliba rongnendak ya Black Sea aser Crimean Peninsula nung rongnendak tulutiba rongnung ka lir. Iba rara nung Novorossiysk rongnendak densema Ukraine nungertemi rongsendak aika makogo.

Novorossiysk ya totzü, totzü nungi adokba osettem den jangotsü, nagmati, fertilizer aser süng export asüba lenmang tongtibang rongnung ka lir.

Ukraine nung sepaitemi Russia nung indang rong kar amakba sülen Moscow indang Black Sea fleet ya Crimea kübok Sevastopol nungi Novorossiysk-i anir ao, koba Ukraine nungi talangba pilar lir. Defence Ministry-isa, parnoki Russia kübok litsü balala amaktsü atema yokba drone 10 nokdangogo, ta metetdaktsü.

Kasa mapang nung Kyiv-i ashiba agi, Russia military-i Ukraine nung litsü maneni amakba atema telangzüba agüja parnoki Moscow indang military, transport aser energy infrastructure tem maka arudar.

US tir atema toktepba nungi Biden anentsü ajungshir

Washington, Chiteni/July 03 (Agencies): United States Tir Joe Biden dang pa iba office nung amentsü temang aser tekolok agi temsüa lir ta sayutsü par party nungi ajungshir aser Democratic telok nungi ozüng yanglur katibo yimjak nung pa tanaben tir inyaksü atema toktepba nungi anenang ta shiogo.

Taoba hopta Republican telok nungi pa den tokteper Donald Trump den o intepba mapang arishi küm 81 tain Biden-i o kanga kamia jembi aser ojang atongtepa mejembiteti liasü.

Texas nungi House representative Lloyd Doggett-i Mongulbarnü yimjak nung Biden dang tir asoshi toktepba anentsü ayongzüik, koba par party nungi züngsem mezüngbubai ola adoker alitsü.

"Mapang ka Lyndon Johnson shimba congressional district ka nungi ni lir. Tensa khenyongi balaka kübok pai temulung shiranga tir asoshi toktepba nungi anena liasü," ta Doggett-i sangdong ka nung ashi.

"Tir Biden-ia kasaji inyaksüla." Washington state nungi House representative Marie Gluesenkamp Perez-ia Biden dang tir asoshi toktepba nungi anentsübo mashi saka Brehostibarnü o intepba ajanga November ita election nung pa timtem ajurutsü akok ta shia liasü.

"Asenok ajaki kasa nguogo, nai aji memelenshitetsü, aser Biden-i Trump makoktsü ama bilemer. Ibai tasak lir, saka iba o intepba nung raksago," ta Perez-i Portland nungi osangbener dang ashi.

Maine nungi House representative Jared Golden-ia Trump-i akoktsü südi ta

amanger aser kecha masü, ta ashi. "Tir Joe Biden ya party indang nominee ka ama iba toktepba nungi anentsü asü masü ta Democrats aika tsüboteper. Biden-i o intepba nung junga shilem magiba ya taoksatsü mali," ta Golden-i ashi.

Taoba mapang House nung Speaker Nancy Pelosi aser Representative Jim Clyburn natia o intepba sülen Biden temang majungba indang khuret abentsü tim lir ta ashi. Ajisüaka Pelosi indang odongtar kati lai Biden dak tamang akar aser pa indang inauguration nung adentsü sentong lir ta ashi.

Democratic party nungi taoba tir Barack Obama aser Bill Clinton nungeri aser White House ajanga Biden bhukuma jembiaka külem party puri tebilemsü akar.

Pa temang junga lir ta sayutsü mechi Biden ya senden balala nung adentsü aser osangbener den jembi television interview atema amentsü ta White House ajanga Mongulbarnü shia liasü.

Bodhbarnü pai Democratic governor tem ajurutsü sentong lir. O intepba nung junga shilem magitetaka pai tir asoshi toktepba menden aitsütsü indangbo par camp-ia mashi aser pa dak dementia mesüra danga timtem mali ta shia liasü.

White House indang press secretary Karine Jean-Pierre-i osangbener den jembidang o intepba aonung Biden yimra tonger liasü ta ashi.

Mongulbarnü fundraiser sentong ka nung jembidang pa anisüngzüik makai France aser Italy semdangba ajanga junga shilem magitet, ta Biden-i ashi. Ajisüaka o intepsü hopta pa

presidential retreat Camp David nung anisüngzüka munga liasü.

"Ni mekundang liasü. Ni alima sema ishilen senzütsü telemtetba agi," ta Biden-i ashi.

Biden-i pa ainlen jajatsü atema pa indang adviser temi ashiba manga ta ashi aser asayamenüa o inyepba mapang pa tera agi amoa mao ta ashi.

O intepba sülen CNN poll ka agiba nung registered voter quarters asem-i Biden masü dangar kari toktepra Democrats teloki akoktsü maongka tajungba lir ta ashi.

Voters temi Biden (shilem 43) dang Trump (shilem 49) tesaklokba liasü.

Vice President Kamala Harris jenjang tera tajungba liasü, aser la bhukumer voters shilem 45 aser Trump bhukumer shilem 47 liasü.

Biden melentsü atema Democrats rongnung California Governor Gavin Newsom aser Transportation Secretary Pete Buttigieg nungera ajungtsü ta ashir.

Biden camp ajanga iba o intepba ya khen mejungi shilem agiba ama sayutsü merangaka pa arishi küm nung tain akumba indang bilemetsüa tatalokba aika lir, koba nüburtemi mapang talangka nungi khuret süa agir.

ABC News/Ipsos poll ka February ita sayaba nung telangzür shilem 86-i Biden ya tir ka ama ano kümsük ka inyaksü kanga tain lir ta shia liasü.

Ajisüaka Mongulbarnü Harris-i, "Ajiang, Joe Biden ya asen nominee lir. Asenoki Trump khen kokogo aser asenoki ano khen akoktsü, o tatem," ta CBS News den sensaksem dang shia liasü.

Kenya nung sorkar anema longkak aiter 270 dak tema apu

Nairobi, Chiteni/July 3

(Agencies): Kenya nung sorkar anema longkak aitba mapang police-i nisung 270 dak tema puogo. Police-i ashiba agi, item nisungtem ya tanga tebilemba bener longkakaitertem ama inyaksangshia liasü.

"Security force temi linük ajunga nung longkak aitertem ama ozüng alema inyaksangshia alirtem bushiteta puogo," ta Directorate of Criminal Investigations (DCI)-i ashi.

DCI-isa, temulung melemer bilemer 204 linük yimtiba Nairobi nung apu aser ano nisung 68 linük kübok tanga tesem nungi pua liasü.

Interior Cabinet Secretary Kithure Kindiki shibai longkak aitba aija liasü, pai parnok ya ozüng alema inyaksangshirtem ta ashiba den, sorkari ozüng alema inyaksangshiba maparen balala nung tensema alirtem anema jenjang tapet agitsü ta tekümdangtsü metetdaktsüogo.

Mongolbarnü Riot police-i Nairobi aser linük kübok tesem balala nung parnok dak long agi aonba longkak aitertem dak tear gas khalokja liasü. Taoba hopta longkak aitba mapang longkak aitertem 20 dak tema taküm sama liasü.

Sorkari finance bill ka benokba sülen nüburtemi longkak ait tenzüka liasü, kechiyong iba ajanga nüburtem tanga timtem tekangshi nung aliba tali tamajungba kümdaktsütsü ta bilemer.

Tir William Ruto-i iba jenjang ya magitsü atema telemtetba agiogo, ajisüaka longkak aitertem pa mapa nungi anentsü khanga arudar.

Kenya National Commission on Human Rights (KNCHR)-i ashiba agi, hopta ana longkak aitba mapang nisung 39 süogo aser nisung 361 yiruogo.

KNCHR-isa, Hombarnü sangdong ka ajanga longkak aitertem dak tashiyim amshiba aitsüogo.

Mombasa nung Milan Waudo-i Reuters news agency dang ashiba agi, "nüburtem yimtung nung südar, ajisüaka pai sen indang dang jembi. Onok ya sen masü. Onok ya meimchir lir.

"Pai (Ruto) par nüburtem anepalutsü nüngdaker, kechiyong pai par nüburtem anepalu mesütetra onoki pa menden nung menüngdaker," ta ashi.

Kasa mapang nung ano Brehostibar aser Deobarnüa longkak aittsü atema ayongzüker lir.



### Tetso College nung Summer Basketball Coaching Camp agitsü

**TETSO COLLEGE**  
STRIVE FOR EXCELLENCE

**TETSO ARENA**

## SUMMER BASKETBALL COACHING CAMP

In Collaboration with Nagaland Basketball Association

Date: 8th-13th July Venue: Tetso College

**Registration Fee: ₹1500**

**CHUMBEN HUMTSOE**  
NIS Coach  
FIBA CERTIFIED

**TEMSU LONGKUMER**  
MP.ED  
SPECIALIZED IN BASKETBALL & SPORTS TRAINING

For more Information  
CONTACT: 700598081 / 9774244256

**Dimapur, Chiteni/July 3 (TYO):** Nagaland Basketball Association den longjemer Tetso College nung July 8 nungi 13 tashi Summer Basketball Coaching Camp ka ayongzüka alitsü sentong yanglur aliba ketdangsurtemi metetdaksüogo.

Lanur basketball asyartem anitetsü aser iba tesem nung sportsmanship ajungketsü nükjiong nung iba camp ayongzüko. Camp nung NIS Coach aser FIBA certified trainer Chumben Humtsoe, basketball aser sports training nung mongin Temsu

Longkumer, M.P.Ed nunger densema coach tejentem aikati camp nung shilem agirtem nem tangazükba agütsüsü.

Parnoki camp nung shilem agirtem dang len sayutsü aser training agütsüsü. Camp ya basketball asyatsü jangrartem ajak atema lir aser iba ajanga asyartem parnok sempet arantetshitsü aser tasa tasen angazüksü asoshi maongka agütsüsü.

Tetso College nungi ketdangsur kati ashiba agi, "Nagaland Basketball Association den longjemer iba camp ayongzüka agitsü atema onok yongya atar. Onok nükjiongji lanur asyartem parnok sempet arantetshitsü aser basketball asaya tali meima kümdaktsüsü atema sabang ka agütsüsü asoshi lir."

Camp mapang dribbling, shooting, defensive techniques, aser team play strategies dak sendakba nung tangazükba agütsüsü. Hopta tepeyong tasa balala angazükba sülen friendly asaya ka asaya-a iba camp tembangtsü.

Camp atema tenüng züngoksemtsü asoshi item number tem; 70059 98081, 97742 44256 nung tongteprateptsü camp ayongertemi metetdaksüogo.

### NEROCA FC aser TRAU FC na I-League nungi relegate süogo

**Chiteni/July 3, 2024 (Agencies):** All India Football Federation (AIFF)-i, NEROCA FC aser TRAU FC na I-League nungi relegate sütsüba Mongolbarnü sangdong ka ajanga metetdaksüogo. Manipur nung amendaker aliba club ana ya 2023-24 season nung ponglang nung tembanga liasü.

Manipur nung May 3 nü nungi tenzüka kin o kin tsünga mangatettep adoker aliba kuli agüja Manipur Chief Minister N Biren Singh-i taoba mapang, Imphal nung amendaker aliba club ana ya relegate mesütsüsü atema mepeshiaka AIFF-i iba telemtetba ya agiogo.

"All India Football Federation-i temzüng ozüng dak ajemdaker I-League 2023-24 nung relegation benoktsü

telemtetba agiogo," ta AIFF-i ashi.

"Team 13 asayaba asayamung nung NEROCA FC-i point 14 aser TRAU FC-i point 13 ngua iba club ana ponglang nung tembanga aser relegate sütsüogo. Mohammedan Sporting Club-i point 52 ngua parnoki iba asayamung koka liasü," ta kasa sangdong ajanga metetdaksü.

May ita I-League Committee-i, result dak ajemdaker NEROCA FC aser TRAU FC na relegate sütsüsü benoka liasü.

Club ana yagi Aizawl FC den asaya neutral venue ka nung asyatsü atema mepeshia liasü. Iba sülen club ana yagi April ita Aizawl nung oa asyatsü memulungi liasü, ibayongji AIFF-i iba asaya ana thija liasü.

### T20I all-rounder tem rongnung Pandya No. 1 asayar kümogo



**Chiteni/July 3, 2024 (Agencies):** Tawa sayaba ICC T20I all-rounder rankings nung India nunger asayar Hardik Pandya jenjang ana tejakdangi tua temaba jenjang nung Sri Lanka nunger asayar Wanindu Hasaranga den kasasa kümogo.

Pai tawa kanga junga asayaba aser talisa World Cup final nung Heinrich Klaasen aser David Miller na indang tongtibang wicket agia kanga junga asayaba ajanga tang No 1 jenjang tongtetogo.

Pandya ya India nunger asyartem rongnungi iba category nung No.1 jenjang atongba mezüngbuba asayar lir.

World Cup asaya tepeyong Pandya-i batting aser bowling naprongla nung team nem teyari agütsüogo. Pai ajak

senteper run 144 yanglu aser wicket 11 agia liasü.

Ajisüaka pai final asaya nung kanga junga asayatetogo, kong pai Klaasen indang wicket agiba ajanga asaya melenshidakja liasü.

Maneni tatembangbuba over nung South Africa puri asaya akoktsü atema run 16 nüngdak aliba mapang Pandya-i ball aon, aser run kanga junga nokdanga India team-i T20 World Cup akokka nung teyari tulu agütsü.

T20I all-rounder rankings top 10 nung ano asayar kar melenshiogo.

Marcus Stoinis, Sikandar Raza, Shakib Al Hasan, aser Liam Livingstone nunger ajak jenjang kaka tejakdangi tuogo.

Ajisüaka Mohammad Nabi bo jenjang pezü asepzüka lua pa top five nungi tuguogo.

### Euro 2024: Turkey-i Austria goal 2-1 agi koka quarter-i iogo



Round of 16 asaya nung Turkey-i Austria goal 2-1 agi akokka sülen Turkey team pur pelatepba noka ka angur.

**Chiteni/July 3, 2024 (Agencies):** Euro 2024 nung round of 16 asaya ka nung Turkey-i Austria goal 2-1 agi akokka sülen Turkey team quarterfinals-i iogo aser parnok Netherlands den asyatsü.

Team anaprongla ya 2008 küm sülen taküm mezüngbuba Euro asayamung nung round of 16 tonga asaya liasü.

Leipzig nung asayaba mapang Turkey nunger asayar Merih Demiral-i minute ka majung tsünga par team atema mezüngbuba goal idaktsü aser iba sülen asaya

atemtsü lia ano pai goal ka idakja parnoki asaya akok.

Vincenzo Montella-i aniba team ya Honibarnü Berlin nung Netherlands den quarter final asyatsü, shirnoki Mongolbarnü Romania goal 3-0 agi kokogo.

Turkey team ya March ita Austria-i goal 6-1 agi koker liasü aser Montella-i iba asaya kanga mejungi makokka küpzüksü imla liasü ta ashi.

Iba asaya nung goal ana idaktsüba sülen Al-Ahli centre-back Demiral ya 1998 World Cup nung France atema

Lilian Thuram-i goal ana idaktsüba sülen Europe nungi defender tem rongnung knockout stage nung asaya ka nung goal ana idaktsüba mezüngbuba asayar kümogo.

Asaya nung Austria atema Michael Gregoritsch-i goal ka idaktsü saka parnoki tanabuba goal magütsütetü asayamung nungi tsükogo.

Asaya tatemtsü lia Christoph Baumgartner-i goal idaktsüsü asoshi maongka tajung ka angu ajisüaka Turkey goalkeeper Mert Gunok-i kanga junga nokdanga liasü.

### BILEMDANGANG

"Nai kechi koma liner yamaji litettsüsa inyangang."